

简体字本二十六史

史记



● 吉林人民出版社

史记

卷三七——卷八〇

〔汉〕

司马迁撰

〔宋〕

裴驷

集解

〔唐〕

司马贞索隐

〔唐〕

张守节

正义

王和申坚等

标点

史记卷三七

世家第七

卫康叔

卫康叔^①名封，周武王同母少弟也。其次尚有冉季，冉季最少。

①[索隐]曰：康，畿内国名。宋忠曰：“康叔从康徙封卫，卫即殷墟定昌之地。畿内之康，不知所在也。”

武王已克殷纣，复以殷余民封纣子武庚禄父，比诸侯，以奉其先祀勿绝。为武庚未集，^①恐其有贼心，武王乃令其弟管叔、蔡叔傅相武庚禄父，以和其民。武王既崩，成王少。周公旦代成王治，当国。管叔、蔡叔疑周公，乃与武庚禄父作乱，欲攻成周。^②周公旦以成王命兴师伐殷，杀武庚禄父、管叔，放蔡叔，以武庚殷余民封康叔为卫君，居河、淇间故商墟。^③

①[索隐]曰：集，和也。

②[索隐]曰：成周，洛阳。其时周公相成王，营洛邑，犹居西周镐京。管、蔡欲搆难，先攻成周，于是周公东居洛邑，伐管、蔡。

③[索隐]曰：宋忠曰：“今定昌也。”

周公旦惧康叔齿少，乃申告康叔曰：“必求殷之贤人君子长者，问其先殷所以兴，所以亡，而务爱民。”告以纣所以亡者以淫于酒，酒之失，妇人是用，故纣之乱自此始。为《梓材》，^①示君子可法则。故谓之《康诰》、《酒诰》、《梓材》以命之。康叔之国，既以此命，能和集其民，民大说。

①[正义]曰：若梓人为材，君子观为法则也。梓，匠人也。

成王长，用事，举康叔为周司寇，赐卫宝祭器，^①以章有德。

①《左传》曰：“分康叔以大路、大旂、少帛、缙茷、旂旌、大吕。”贾逵曰：“大路，金路也。少帛，杂帛也。缙茷，大赤也。通帛为旂，析羽为旌。大吕，钟名。”郑众曰：“缙茷，旆名也。”

康叔卒，子康伯代立。^①康伯卒，子考伯立。考伯卒，子嗣伯立。嗣伯卒，子庸伯立。^②庸伯卒，子靖伯立。靖伯卒，子贞伯立。^③贞伯卒，子顷侯立。顷侯厚赂周夷王，夷王命卫为侯。^④

①[索隐]曰：《系本》康伯名髡。宋忠曰：“即王孙牟也，事周康王为大夫。”按：《左传》所称王孙牟父是也。牟、髡声相近，故不同耳。《周古史考》无康伯，而云子牟伯立，盖以不宜父子俱谥康，故因其名云牟伯也。

②《史记音隐》曰：“音捷”。[索隐]曰：《系本》作“挚伯”。

③[索隐]曰：《系本》作“箕伯”。

④[索隐]曰：按：《康诰》称命尔伋侯于东土，又云“孟侯，朕其弟，小子封”，则康叔初封已为侯也。比子康伯即称伯者，谓方伯之伯耳，非至子即降爵为伯也。故孔安国曰：“孟，长也。五侯之长，谓方伯”。方伯，州牧也，故五代孙祖恒为方伯耳。至顷侯德衰，不监诸侯，乃从本爵而称侯，非是至子即削爵，及顷侯赂夷王而称侯也。

顷侯立十二年卒，子釐侯立。

釐侯十三年，周厉王出奔于彘，共和行政焉。二十八年，周宣王立。

四十二年，釐侯卒，太子共伯余立为君。共伯弟和有宠于釐侯，多予之赂。和以其赂赂士，以袭攻共伯于墓上，共伯入釐侯冢^①自杀。卫人因葬之釐侯旁，谥曰共伯，而立和为卫侯，是为武公。^②

①[索隐]曰：冢音延。延，墓道。又音以战反。恭伯名余也。

②[索隐]曰：和然恭伯代立，此说盖非也。按：季札美康叔、武公之德。又《国语》称武公年九十五矣，犹箴诫于国，恭恪于朝，作抑自微，至于没身，谓之睿圣。又《诗》著卫世子恭伯早卒，不云被杀。若武公杀兄而立，岂可以为训而形之于国史乎？盖太史公采杂说而为此记耳。

武公即位，修康叔之政，百姓和集。四十二年，犬戎杀周幽王，武公将兵往佐周平戎，甚有功，周平王命武公为公。五十五年卒，子

庄公扬立。

庄公五年，取齐女为夫人，好而无子。又取陈女为夫人，生子，早死。陈女女弟亦幸于庄公，而生子完。^①完母死，庄公令夫人齐女子之，^②立为太子。庄公有宠妾，生子州吁。十八年，州吁长，好兵，庄公使将。石碏谏庄公曰：^③“庶子好兵，使将，乱自此起。”不听。

①[索隐]曰：女弟，戴妨也。子完为州吁所杀，戴妨归陈，《诗·燕燕于飞》是也。

②[索隐]曰：子之，谓养之为子也。齐女即庄姜也。《诗·硕人篇》闵之是也。

③贾逵曰：“石碏，卫上卿。”

二十三年，庄公卒，太子完立，是为桓公。

桓公二年，弟州吁骄奢，桓公绌之，州吁出奔。十三年，郑伯弟段攻其兄，不胜，亡，而州吁求与之友。十六年，州吁收聚卫亡人以袭杀桓公，州吁自立为卫君。为郑伯弟段欲伐郑，请宋、陈、蔡与俱，三国皆许州吁。州吁新立，好兵，杀桓公，卫人皆不爱。石碏乃因桓公母家于陈，详为善州吁。至郑郊，石碏与陈侯共谋，使右宰丑进食，因杀州吁于濮，^①而迎桓公弟晋于邢而立之，^②是为宣公。

①服虔曰：“右宰丑，卫大夫。濮，陈地。”[索隐]曰：贾逵云：“濮，陈地。”

按：濮水有受河，又受汴，汴亦受河，东北至离狐分为二，俱东北至巨野入济。则濮在曹卫之间，贾言陈地，非也。若据《地理志》陈留封丘县濮水受沛，当言陈留水也。

②贾逵曰：“邢，周公之胤，姬姓国。”

宣公七年，鲁弑其君隐公。九年，宋督弑其君殇公，及孔父。十年，晋曲沃庄伯弑其君哀侯。

十八年。初，宣公爱夫人夷姜，夷姜生子伋，以为太子，而令右公子傅之。右公子为太子取齐女，未入室，而宣公见所欲为太子妇者好，说而自取之，更为太子取他女。宣公得齐女，生子寿、子朔，令左公子傅之。^①太子伋母死，宣公正夫人与朔共谗恶太子伋。宣公自以其夺太子妻也，心恶太子，欲废之。及闻其恶，大怒，乃使太子

伋于齐而令盗遮界上杀之，^②与太子白旄，而告界盗见持白旄者杀之。且行，子朔之兄寿，太子异母弟也，知朔之恶太子而君欲杀之，乃谓太子曰：“界盗见太子白旄，即杀太子，太子可毋行。”太子曰：“逆父命求生，不可。”遂行。寿见太子不止，乃盗其白旄而先驰至界。界盗见其验，即杀之。寿已死，而太子伋又至，谓盗曰：“所当杀乃我也。”盗并杀太子伋，以报宣公。宣公乃以子朔为太子。

①杜预曰：“左右骊之子，因以为号。”

②[正义]曰：《左传》云卫宣公使太子伋之齐，“使盗待诸莘，将杀之”。杜预云“莘，卫地。”

十九年，宣公卒，太子朔立，是为惠公。左右公子不平朔之立也，惠公四年，左右公子怨惠公之谗杀前太子伋而代立，乃作乱，攻惠公，立太子伋之弟黔牟为君，惠公奔齐。

卫君黔牟立八年，齐襄公率诸侯奉王命共伐卫，纳卫惠公，诛左右公子。卫君黔牟奔于周，惠公复立。惠公立三年出亡，亡八年复入，与前通年凡十三年矣。

二十五年，惠公怨周之容舍黔牟，与燕伐周。周惠王奔温，卫、燕立惠王弟颓为王。二十九年，郑复纳惠王。

三十一年，惠公卒，子懿公赤立。懿公即位，好鹤，^①淫乐奢侈。九年，翟伐卫，卫懿公欲发兵，兵或畔。大臣言曰：“君好鹤，鹤可令击。”翟于是遂入，杀懿公。

①[正义]曰：《括地志》云：“故鹤城在滑州匡城县西南十五里。《左传》云‘卫懿公好鹤，鹤有乘轩者。狄伐卫，公欲战，国人受甲者皆曰“使鹤，鹤实有禄位，余焉能战！”’俗传懿公养鹤于此城，因名也。”

懿公之立也，百姓大臣皆不服。自懿公父惠公朔之谗杀太子伋代立至于懿公，常欲败之，卒灭惠公之后而更立黔牟之弟昭伯顽之子申为君，是为戴公。

戴公申元年卒。齐桓公以卫数乱，乃率诸侯伐翟，为卫筑楚丘，^①立戴公弟燬为卫君，^②是为文公。文公以乱故奔齐，齐人入之。

①[正义]曰：《括地志》云：“城武具有楚丘亭。”

②《贾谊书》曰：“卫侯朝于周，周行人问其名，答曰卫侯辟强，周行人还之，曰启强辟强，天子之号，诸侯弗得用。卫侯更其名曰燬，然后受之。”[正义]曰：燬，音毁。

初，翟杀懿公也，卫人怜之，思复立宣公前死太子伋之后，伋子又死，而代伋死者子寿又无子。太子伋同母弟二人：其一曰黔牟，黔牟尝代惠公为君，八年复去；其二曰昭伯。昭伯、黔牟皆已前死，故立昭伯子申为戴公。戴公卒，复立其弟燬为文公。

文公初立，轻赋平罪，^①身自劳，与百姓同苦，以收卫民。十六年，晋公子重耳过，无礼。十七年，齐桓公卒。

①[索隐]曰：轻赋税，平断刑也。平，或作“卒”。卒谓士卒也。罪字连下读，盖亦一家之义耳。

二十五年，文公卒，子成公郑立。成公三年，晋欲假道于卫救宋，成公不许。晋更从南河度，^①救宋。征师于卫，卫大夫欲许，成公不肯。大夫元咺攻成公，成公出奔。^②晋文公重耳伐卫，分其地予宋，讨前过无礼及不救宋患也。卫成公遂出奔陈。^③二岁，如周求入，与晋文公会。晋使人鸩卫成公，成公私于周主鸩，令薄，得不死。^④已而周为请晋文公，卒入之卫，而诛元咺，卫君瑕出奔。^⑤

①服虔曰：“南河，齐南之东南流河也。”杜预曰：“从汲郡南度，出卫南。”

②[索隐]曰：奔楚。[正义]咺，况远反。

③[索隐]曰：按：《左传》“卫侯闻楚师败，惧，出奔楚，遂适陈”是。

④[索隐]曰：按：私谓略之也。

⑤[索隐]曰：是元咺所立者，成公入而杀之，故僖三十年《经》云：“卫杀其大夫元咺及公子瑕”。此言“奔”，非也。

七年，晋文公卒。十二年，成公朝晋襄公。十四年，秦穆公卒。二十六年，齐邴歆弑其君懿公。^①

①[索隐]曰：邴歆与《左氏》同，而《齐世家》作“邴戎”者，盖邴歆掌御戎车，故号邴戎。邴，音丙。歆，亦作“鄆”。

三十五年，成公卒，^①子穆公遯立。^②穆公二年，楚庄王伐陈，

杀夏征舒。三年，楚庄王围郑，郑降，复释之。十一年，孙良夫救鲁伐齐。复得侵地。

①《世本》曰：“成公徙濮阳。”宋忠曰：“濮阳，帝丘，地名。”

②[正义]曰：遽，音速。

穆公卒，子定公臧立。定公十二年卒，子献公衎立。

献公十三年，公令师曹教宫妾鼓琴，①妾不善，曹笞之。妾以幸恶曹于公；公亦笞曹三百。十八年，献公戒孙文子、宁惠子食，皆往。日旰不召，②而去射鸿于囿。二子从之，③公不释射服与之言。④二子怒，如宿。⑤孙文子子数侍公饮，⑥使师曹歌《巧言》之卒章。⑦师曹又怒公之尝笞三百，乃歌之，欲以怒孙文子，报卫献公。文子语蘧伯玉，伯玉曰：“臣不知也。”⑧遂攻出献公。献公奔齐，齐置卫献公于聚邑。孙文子、宁惠子共立定公弟秋⑨为卫君，是为殇公。

①贾逵曰：“师曹，乐人。”

②服虔曰：“孙文子，林父也。宁惠子，宁殖也。敕戒二子，欲共晏食，皆服朝衣待命。旰，晏也。”

③服虔曰：“从公于囿。”

④《左传》曰：“不释皮冠。”

⑤服虔曰：“孙文子邑也。”[索隐]曰：《左传》作“臧”，此亦音臧。

⑥《左传》曰文子子即孙蒯也。

⑦杜预曰：“《巧言》，《诗·小雅》也。其卒章曰：‘彼何人斯？居河之湄。无拳无勇为乱阶。’公欲以譬文子居河上而为乱。”

⑧贾逵曰：“伯玉，卫大夫。”

⑨徐广曰：“班氏云献公弟蒯。”

殇公秋立，封孙文子林父于宿。十二年，宁喜与孙林父争宠相恶，殇公使宁喜攻孙林父。林父奔晋，复求入故卫献公。献公在齐，齐景公闻之，与卫献公如晋求入。晋为伐卫，诱与盟。卫殇公会晋平公，平公执殇公与宁喜而复入卫献公。献公亡在外十二年而入。

献公后元年，诛宁喜。三年，吴延陵季子使过卫，见蘧伯玉、史鳅，曰：“卫多君子，其国无故。”过宿，孙林父为击磬，曰：“不乐，音大悲，使卫乱乃此矣。”

是年献公卒，子襄公恶立。襄公六年，楚灵王会诸侯，襄公称病不往。

九年，襄公卒。初，襄公有贱妾，幸之，有身，梦有人谓曰：“我康叔也，令若子必有卫，名而子曰‘元’。”妾怪之，问孔成子。^①成子曰：“康叔者，卫祖也。”及生子，男也，以告襄公。襄公曰：“天所置也。”名之曰元。襄公夫人无子，于是乃立元为嗣，是为灵公。

^①服虔曰：“卫卿孔蒸钮。”

灵公五年，朝晋昭公。六年，楚公子弃疾弑灵王自立，为平王。十一年，火。三十八年，孔子来，禄之如鲁。后有隙，孔子去。后复来。

三十九年，太子蒯聩与灵公夫人南子有恶，^①欲杀南子。蒯聩与其徒戏阳邀谋，朝，使杀夫人。^②戏阳后悔，不果。蒯聩数目之，夫人觉之，惧，呼曰：^③“太子欲杀我！”灵公怒，太子蒯聩奔宋，已而之晋赵氏。

^①贾逵曰：“南子，宋女。”

^②贾逵曰：“戏阳邀，太子家臣。”[正义]曰：戏音羲。

^③[正义]呼，火故反。

四十二年春，灵公游于郊，令子郢仆。^①郢，灵公少子也，字子南。灵公怨太子出奔，谓郢曰：“我将立若为后。”郢对曰：“郢不足以辱社稷，君更图之。”^②夏，灵公卒，夫人命子郢为太子，曰：“此灵公命也。”郢曰：“亡人太子蒯聩之子辄在也，不敢当。”于是卫乃以辄为君，是为出公。

^①贾逵曰：“仆，御也。”

^②服虔曰：“郢自谓己无德，不足立，以污辱社稷。”

六月乙酉，赵简子欲入蒯聩，乃令阳虎诈命卫十余人衰经归，^①简子送蒯聩。卫人闻之，发兵击蒯聩。蒯聩不得入，入宿而保，卫人亦罢兵。

^①服虔曰：“衰经，为若从卫来迎太子也。”

出公辄四年，齐田乞弑其君孺子。八年，齐鲍子弑其君悼公。孔

子自陈入卫。九年，孔文子问兵于仲尼，仲尼不对。其后鲁迎仲尼，仲尼反鲁。

十二年。初，孔圉文子取太子蒯聩之姊，生愷。孔氏之竖浑良夫美好，孔文子卒，良夫通于愷母。太子在宿，愷母使良夫于太子。太子与良夫言曰：“苟能入我国，报子以乘轩，免子三死，毋所与。”^①与之盟，许以愷母为妻。闰月，良夫与太子入，舍孔氏之外圃。^②昏，二人蒙衣而乘，^③宦者罗御，如孔氏。孔氏之老栾宁问之，^④称姻妾以告。^⑤遂入，适伯姬氏。^⑥既食，愷母杖戈而先，^⑦太子与五人介，舆假从之。^⑧伯姬劫愷于厕，强盟之，遂劫以登台。^⑨栾宁将饮酒，炙未熟，闻乱，使告仲由。^⑩召护驾乘车，^⑪行爵食炙，^⑫奉出公辄奔鲁。^⑬

①杜预曰：“轩，大夫车也。三死，死罪三。”[正义]曰：杜预云：“三罪，紫衣、袒裘、带剑也。”紫衣，君服也。热，故偏袒，不敬也。卫侯求令名者与之食焉，太子请使良夫，良夫紫衣狐裘，不释剑而食，太子使牵退，数之罪而杀之。

②服虔曰：“圃，园。”

③服虔曰：“二人，谓良夫、太子。蒙衣，为妇人之服，以巾蒙其头而共乘也。”

④服虔曰：“家臣称老。问其姓名。”

⑤贾逵曰：“婚姻家妾也。”

⑥服虔曰：“入孔氏家，适伯姬所居。”

⑦服虔曰：“先至孔愷所。”

⑧贾逵曰：“介，被甲也。舆假豚，欲以盟。”

⑨服虔曰：“于卫台上召卫群臣。”

⑩服虔曰：“季路为孔氏邑宰，故告之。”

⑪服虔曰：“召护，卫大夫。驾乘车，不驾兵车也，言无距父之意。”

⑫服虔曰：“栾宁使召季路，乃行爵食炙。”

⑬服虔曰：“召护奉卫侯。”

仲由将入，遇子羔将出，^①曰：“门已闭矣。”子路曰：“吾姑至矣。”^②子羔曰：“不及，莫践其难。”^③子路曰：“食焉不辟其难。”^④

子羔遂出。子路入，及门，公孙敢阖门，曰：“毋入为也！”^⑤子路曰：“是公孙也？求利而逃其难。由不然，利其禄，必救其患。”有使者出，子路乃得入。曰：“太子焉用孔悝？虽杀之，必或继之。”^⑥且曰：“太子无勇。若燔台，必舍孔叔。”太子闻之，惧，下石乞、孟廛敌子路，^⑦以戈击之，割缨。子路曰：“君子死，冠不免。”^⑧结缨而死。^⑨孔子闻卫乱，曰：“嗟乎！柴也其来乎？由也其死矣！”孔悝竟立太子蒯聩，是为庄公。

①贾逵曰：“子羔，卫大夫高柴，孔子弟子也。将出，奔。”

②杜预曰：“且欲至门。”

③贾逵曰：“言家臣忧及及国，不得践履其难。”郑众曰：“是时辄以出，不及事，不当践其难。子羔言不及，以为季路欲死国也。”

④服虔曰：“言食悝之禄，欲救悝之难，此明其不死国也。”

⑤服虔曰：“公孙敢，卫大夫。言辄已出，无为复入。”

⑥王肃曰：“必有继续其后攻太子。”

⑦服虔曰：“二子，蒯聩之臣。敌，当也。”[正义]曰：燔，音烦。舍，音舍。廛，音乙减反。

⑧服虔曰：“不使冠在地。”

⑨[正义]曰：纓，冠绦也。

庄公蒯聩者，出公父也，居外，怨大夫莫迎立。元年即位，欲尽诛大臣，曰：“寡人居外久矣，子亦尝闻之乎？”群臣欲作乱，乃止。

二年，鲁孔丘卒。

三年，庄公上城，见戎州。^①曰：“戎虜何为是？”戎州病之。十月，戎州告赵简子，简子围卫。十一月，庄公出奔，^②卫人立公子斑师为卫君。^③齐伐卫，虜斑师，更立公子起为卫君。^④

①贾逵曰：“戎州，戎人之邑。”[索隐]曰：《左传》云“戎州人攻之”是也。隐二年“公会戎于潜”，杜预云：“陈留济阳县东南有戎城”。济阳与卫近，故庄公登台而望见戎州。又七年云“戎伐凡伯于楚丘”，是戎与卫相近也。

②[索隐]曰：《左传》庄公本由晋赵氏纳之，立而背晋，晋伐卫，卫人出庄公，立公子般师。晋师退，庄公复入，般师出奔。初，公登城见戎州己氏

之妻发美，髡之以为夫人髻。又欲剪戎州，兼逐石圃，故石圃攻庄公。庄公惧，逾北墙折股，入己氏，己氏杀之。今系家不言庄公复入及死己氏，直云出奔，亦其疏也。又《左传》云卫复立般师，齐伐卫，立公子起，执般师。明年，卫石圃逐其君起，起奔齐，出公辄复归。是《左氏》详而系家略也。

③《左传》曰：“班师，襄公之孙。”

④服虔曰：“起，灵公子。”

卫君起元年，卫石曼专逐其君起，^①起奔齐。卫出公辄自齐复归立。初，出公立十二年亡，亡在外四年复入。出公后元年，赏从亡者。立二十一年卒，^②出公季父黔攻出公子而自立，是为悼公。

①[索隐]曰：《左传》作“石圃”，此作“曼”，音圃，《谷梁》作“曼姑”。尊，或音姑。诸本多无“曼”字。

②[索隐]曰：按：出公初立十二年，亡在外四年，复入九年卒，是立二十一年。自即位至卒，凡经二十五年而卒于越。

悼公五年卒，^①子敬公弗立。^②敬公十九年卒，子昭公纠立。^③是时三晋强，卫如小侯，属之。^④

①[索隐]曰：《纪年》云“四年卒于越”。《系本》名虔。

②《世本》云敬公费也。

③[索隐]曰：《系本》云敬公生桡公舟，非也。

④[正义]曰：属赵也。

昭公六年，公子亶^①弑之代立，是为怀公。怀公十一年，公子颓弑怀公而代立，是为慎公。慎公父，公子适；^②适父，敬公也。

①[正义]曰：音尾。

②[索隐]曰：音的。《系本》“适”作“虔”。虔，悼公也。

慎公四十二年卒，子声公训立。^①声公十一年卒，子成侯速^②立。成侯十一年，公孙鞅入秦。^③十六年，卫更贬号曰侯。

①[索隐]曰：训，亦作“驯”，同休运反。《系本》作“圣公驰”。

②[索隐]曰：音速。《系本》作“不逝”。按：上穆公已名速，不可成侯更名，则《系本》是也。

③[索隐]曰：《秦本纪》云孝公元年鞅入秦，又按年表，成侯与秦孝公同

年，然则“十一年”当为“元年”，字误耳。

二十九年，成侯卒，子平侯立。平侯八年卒，子嗣君立。^①嗣君五年，更贬号曰君，独有濮阳。四十二年卒，子怀君立。

①[索隐]曰：乐资据《纪年》，以嗣君即孝襄侯。

怀君三十一年，朝魏，魏囚杀怀君。魏更立嗣君弟，是为元君。元君为魏婿，故魏立之。^②元君十四年，秦拔魏东地，^③秦初置东郡，更徙卫野王县，^④而并濮阳为东郡。二十五年，元君卒，子君角立。

①徐广曰：“班氏云元君者，怀君之弟。”

②[索隐]曰：魏都大梁，濮阳、黎阳并是魏之东地，故立郡名东郡也。

③年表云元君十一年秦置东郡，十二年卫徙野王，二十三年卒。[索隐]曰：年表，与此不同。徐注备矣。

君角九年，秦并天下，立为始皇帝。二十一年，二世废君角为庶人，卫绝祀。

太史公曰：余读世家言，至于宣公之太子以妇见诛，弟寿争死以相让，此与晋太子申生不敢明骊姬之过同，俱恶伤父之志。然卒死亡，何其悲也！或父子相杀，兄弟相灭，亦独何哉？

索隐述赞曰：司寇受封，《梓材》有作。成锡厥器，夷加其爵。暨武能修，从文始约。《诗》美归燕，《传》矜石碣。皮冠射鸿，乘轩使鹤。宣纵淫嬖，亶生伋、朔。蒯聩得罪，出公行恶。卫祚日衰，失于君角。

史记卷三八

世家第八

宋微子

微子开者，^①殷帝乙之首子而纣之庶兄也。^②

①孔安国曰：“微，畿内国名。子，爵也。为纣卿士。”[索隐]曰：按：《尚书·微子之命篇》云命微子启代殷后，今此名开者，避汉景帝讳也。

②[索隐]曰：按：《尚书》亦以为殷王元子而是纣之兄。《吕氏春秋》云生微子时母犹为妾，及为妃而生纣。故微子为纣同母庶兄。

纣既立，不明，淫乱于政，微子数谏，纣不听。及祖伊以周西伯昌之修德，灭隗，^①隗国惧祸至，以告纣。纣曰：“我生不有命在天乎？是何能为！”于是微子度纣终不可谏，欲死之，及去。未能自决，乃问于太师、少师，^②曰：“殷不有治政，不治四方。”^③我祖遂陈于上，纣沈湎于酒，妇人是用，乱败汤德于下。^④殷既小大好草窃奸宄，^⑤卿士师师非度，^⑥皆有罪辜，乃无维获，^⑦小民乃并兴，相为敌仇。^⑧今殷其典丧，若涉水无津涯。^⑨殷遂丧，越至于今。”^⑩曰：“太师，少师，^⑪我其发出往？^⑫吾家保于丧？^⑬今女无故告^⑭予，颠跻，如之何其？”^⑮太师若曰：“王子，天笃下灾亡殷国，^⑯乃毋畏畏，不用老长。^⑰今殷民乃陋淫神祇之祀。^⑱今诚得治国，国治，身死不恨。为死，终不得治，不如去。”遂亡。^⑲

①徐广曰：“隗，音耆。”[索隐]曰：耆即黎也。邹诞本云“耆音黎”。孔安国云：“黎在上党东北，即今之黎亭。”

②孔安国曰：太师，三公，箕子也。少师，孤卿，比干也。

③孔安国曰：“言殷不有治政四方之事，将必亡也。”

- ④马融曰：“我祖，汤也。”孔安国曰：“言汤遂其功，陈力于上也。”
- ⑤马融曰：“下，下世也。”
- ⑥孔安国曰：“萆野盗窃，又为奸宄于外内。”
- ⑦马融曰：“非但小人为奸宄，卿士已下专相师效，为非法度。”
- ⑧郑玄曰：“获，得也。群臣皆有是罪，其爵禄又无常得之者。言屡相攻夺。”
- ⑨孔安国曰：“卿士既乱，而小民各起，共为敌仇。言不和同。”
- ⑩徐广曰：“一作‘陟水无舟航’，言危也。”駉谓典，国典也。[索隐]曰：《尚书》“典”作“沦”，篆字变易，其义亦殊。丧，音息浪反。
- ⑪马融曰：“越，于也。于是至矣，于今到矣。”
- ⑫马融曰：“重呼告之。”
- ⑬郑玄曰：“发，起也。紂祸败如此，我其起作出往也。”[索隐]曰：往，《尚书》作“狂”，盖亦《今文尚书》意异耳。
- ⑭徐广曰：“一云‘于是家保’。”駉案：马融曰：“卿大夫称家。”
- ⑮王肃曰：“无意告我也，是微子求教诲也。”
- ⑯马融曰：“躋，犹坠也。恐颠坠于非义，当如之何也。”郑玄曰：“其，语助也。齐鲁之间声如‘姬’。《记》曰‘何居’。”
- ⑰孔安国曰：“微子，帝乙子，故曰‘王子’。天生紂为乱，是下灾也。”郑玄曰：“少师不答，志在必死。”[正义]曰：菑，音灾。
- ⑱孔安国曰：“上不畏天灾，下不畏贤人，违戾耆老之长，不用其教。”
- ⑲徐广曰：“一云‘今殷民侵神祇’，又一云‘陋淫侵神祇’。”駉案：马融曰：“天曰神，地曰祇。”[索隐]曰：《尚书》作“攘窃”。刘氏云“陋淫犹轻秽也。”

箕子者，①紂亲戚也。②紂始为象箸，③箕子叹曰：“彼为象箸，必为玉杯；为杯，则必思远方珍怪之物而御之矣。舆马宫室之渐自此始，不可振也。”紂为淫佚，箕子谏，不听。人或曰：“可以去矣。”箕子曰：“为人臣谏不听而去，是彰君之恶而自说于民，吾不忍为也。”乃被发佯狂而为奴。遂隐而鼓琴以自悲，故传之曰《箕子操》。④

①马融曰：“箕，国名也。子，爵也。”

②[索隐]曰：司马彪曰：“箕子名胥余”。马融、王肃以箕子为紂之诸父。服虔、杜预以为紂之庶兄。杜预云“梁国蒙县有箕子冢。”

③[索隐]曰：箸，音持略反。按下文云“为象箸必为玉杯”，杯箸事相近，《周礼》六尊有牺、象、箸、壶、泰、山。箸尊者，箸地无足是也。刘氏音直虑反，则杯箸亦食用之物，亦并通为器。

④《风俗通义》曰：“其道闭塞忧愁而作者，命其曲曰操。操者，言遇灾遭害，困厄穷迫，虽怨恨失意，犹守礼义，不惧不慑，乐道而不改其操也。”

王子比干者，亦纣之亲戚也。见箕子谏不听而为奴，则曰：“君有过而不以死争，则百姓何辜？”乃直言谏纣。纣怒曰：“吾闻圣人之心有七窍，信有诸乎？”乃遂杀王子比干，剖视其心。

微子曰：“父子有骨肉，而臣主以义属。故父有过，子三谏不听，则随而号之；人臣三谏不听，则其义可以去矣。”于是太师、少师乃劝微子去，遂行。^①

①时比干已死，而云少师者似误。

周武王伐纣克殷，微子乃持其祭器造于军门，肉袒面缚，^①左牵羊，右把茅，膝行而前以告。于是武王乃释微子，复其位如故。

①[索隐]曰：肉袒者，袒而露肉也。面缚者，缚手于背而面向前也。刘氏云“面即背也”，义稍迂。

武王封纣子武庚禄父，以续殷祀，使管叔、蔡叔傅相之。

武王既克殷，访问箕子。

武王曰：“於乎！维天阴定下民，相和其居，^①我不知其常伦所序。”^②

①孔安国曰：“天不言而默定下民，助合其居，使有常生之资也。”

②孔安国曰：“言我不知天所以定民之常道理次序，问何由。”

箕子对曰：“在昔鯀陞鸿水，汨陈其五行，^①帝乃震怒，不从鸿范九等，常伦所斲。^②鲧则殛死，禹乃嗣兴。^③天乃锡禹鸿范九等，常伦所序。^④

①孔安国曰：“陞，塞；汨，乱也。治水失道，是乱陈五行。”

②徐广曰：“一作‘释’。”駉案：郑玄曰“帝，天也。天以鲧如是，乃震动其威怒，不与天道大法九类，言王所问所由败也”。

③郑玄曰：“《春秋传》曰‘舜之诛也殛鲧，其举也兴禹’。”

④孔安国曰：“天与禹，洛出书也。神龟负文而出，列于背，有数至于九，禹遂因而第之以成九类。”

“初一日五行；二曰五事；三曰八政；四曰五纪；五曰皇极；六曰三德；七曰稽疑；八曰庶征；九曰向用五福，畏用六极。”①

①马融曰：“言天所以畏惧人用六极。”

“五行：一曰水，二曰火，三曰木，四曰金，五曰土。”①水曰润下，火曰炎上，②木曰曲直，③金曰从革，④土曰稼穡。⑤润下作咸，⑥炎上作苦，⑦曲直作酸，⑧从革作辛，⑨稼穡作甘。”⑩

①郑玄曰：“此数本诸阴阳所生之次也。”

②孔安国曰：“言其自然之常性也。”

③孔安国曰：“木可揉使曲直也。”

④马融曰：“金之性从人而更，可销铄。”

⑤王肃曰：“种之曰稼，敛之曰穡。”

⑥孔安国曰：“水卤所生。”

⑦孔安国曰：“焦气之味。”

⑧孔安国曰：“木实之性。”

⑨孔安国曰：“金气之味。”

⑩孔安国曰：“甘味生于百谷。五行以下，箕子所陈。”

“五事：一曰貌，二曰言，三曰视，四曰听，五曰思。貌曰恭，言曰从，①视曰明，听曰聪，思曰睿。②恭作肃，从作治，③明作智，聪作谋，④睿作圣。”⑤

①马融曰：“发言当使可从。”

②马融曰：“睿，通也。”

③马融曰：“出令而从，所以为治也。”

④孔安国曰：“所谋必成审也。”马融曰：“上聪则下进其谋。”

⑤孔安国曰：“于事无不通，谓之圣。”

“八政：一曰食，二曰货，三曰祀，四曰司空，①五曰司徒，②六曰司寇，③七曰宾，④八曰师。”⑤

①马融曰：“司空，掌管城郭，主空土以居民。”